

**Տ. ԱՌԵՆ ԱՐԵՂԱ ՃԵՊԵՃՅԱՆԻ ՔԱՐՈՋԸ՝
ԽՈՍՎԱԾ Ս. ԷԶՄԻԱԾՆԻ ՄԱՅՐ ՏԱՃԱՐՈՒՄ
ՄԱՏՈՒՑՎԱԾ Ս. ՊԱՏԱՐԱԳԻՆ
(20 հուլիսի 2008)**

«Յանուն Հոր եւ Որդւոյ եւ Հոգւոյն Սրբոյ. Ամէն»:

Այսօրվա ավետարանական ընթերցվածում ասվում է. «Քանի որ Աստված այնքան սիրեց աշխարհը, որ մինչև իսկ Իր Միածին Որդուն տվեց, որպեսզի նա, ով հավատում է Նրան, չկորչի, այլ հավիտենական կյանք ունենա» (Հովհ. Գ 16):

Միբելի եղբայրներ և քույրեր ի Քրիստոս, քրիստոնեության մեջ թերևս ամենից սիրված և ժողովրդական հատվածն է այս: Այս հատվածը մեզ տալիս է քրիստոնեության գաղափարի ամբողջ կորիզը, որ Աստված ուղարկեց մեզ Իր Միածին Որդուն: Այսինքն, սիրելիներ, Աստված Իր Միածին Որդուն ուղարկելով, ուղարկեց մեզ կատարյալ սեր: Այո՛, կատարյալ սեր: Վերցնելով Քրիստոս որպես կատարյալ օրինակ սիրո, մենք տեսնում ենք, որ Աստված Իր Միածին Որդուն ուղարկեց մեզ, որպեսզի Իր Որդին զոհվի մեզ համար, մեր փրկության համար, և դա է կատարյալ սերը: Մենք որպես թե գիտենք, թե սերը ինչ է: Իբրև թե մենք ասում ենք, որ՝ այո՛, մենք հասկանում ենք, թե սերը ի՛նչ է: Մենք ասում ենք, որ սիրում ենք մեր ծնողներին, սիրում ենք մեր Եկեղեցին, սիրում ենք Հայաստանը, սիրում ենք մեր տները, մեր ընկերներին, մեր քույրերին, եղբայրներին. բայց արդյո՞ք, սիրելի քույրեր և եղբայրներ, մենք պատրաստ ենք անել՝ ինչ որ Քրիստոս արեց մեզ համար՝ մեր կյանքը տալու ուրիշի համար. դա է կատարյալ սերը: Եվ ավելի լավ հասկանալու այս սերը, այս հարաբերությունը, մենք պետք է լավ հասկանանք մեր հարաբերությունը մեր և Աստծո միջև: Որովհետև մենք պետք է ունենանք առողջ հարաբերություն: Այո, մենք տեսնում ենք մեր կյանքում ծնողներ կամ ամուսնացած զույգեր, և մենք ասում ենք՝ այո, առողջ հարաբերություն ունեն, առողջ սեր ունեն, որովհետև անընդհատ իրար հետ խոսում են, անընդհատ իրար հեռաձայնում են: Կամ երբեմն ու երբեմն այս արդի աշխարհում հաղորդագրություններ են ուղարկում, որպեսզի մյուսը իմանա, որ մտածում է իր սիրելին իր մասին: Բայց նաև մենք գիտենք՝ ի՛նչ է ոչ առողջ հարաբերությունը: Եվ երբեմն մենք ենթարկվում ենք ոչ առողջ հարաբերության մեր ու Աստծո միջև: Երբեմն օրեր կան, որ մենք չենք խոսում Աստծո հետ, երբեմն օրեր, շաբաթներ կան, որ մենք չենք աղոթում, երբեմն օրեր կամ շաբաթներ կան, որ մենք բարիքներ չենք անում մեր եղբայրների և քույրերի համար: Եթե մենք իսկապես ունենանք առողջ սեր, առողջ ըմբռնում այս հատվածից, այնժամ անընդհատ մեր հարաբերությունը մեր ու Աստծո միջև սերտ հարաբերություն պիտի լինի, լավ հարաբերություն պիտի լինի:

Միբելի եղբայրներ և քույրեր ի Քրիստոս, այս հատվածից ես պիտի բաժանեմ ձեզ հետ մի փոքրիկ գաղտնիք: Այս հատվածի գաղտնիքը, կորիզը, որ Աստված մեզ ու-

դարկեց, այո՛, Իր Միածին Որդուն. բայց բուն գաղտնիքը այն է, որ Աստված մեզ տալիս է, ինչ որ պետք է մեզ, ինչ որ հարկավոր է մեզ: Մենք շատ բաներ ենք ուզում այս աշխարհից, այս կյանքից: Եվ մենք պետք է լավ ըմբռնենք ու հասկանանք, որ մեր հարաբերությունը մեր ու Աստծո միջև Ձմեռ պապիկի նման չէ, որ մենք խնդրենք, նա էլ տա: Երբեմն ու երբեմն մենք պահանջում ենք Աստծուց, որ այսպես կամ այնպես պարզևի մեզ, բայց մենք պետք է լավ հասկանանք, որ Աստված տալիս է մեզ, ինչ որ պետք է: Մենք աղոթում ենք առ Աստված այնինչի կամ այսինչի համար, բայց Աստված տալիս է մեզ, ինչ որ հարկավոր է, ինչ որ պետք է:

Միրելի եղբայրներ և քույրեր, մենք բոլորս, որ այս տաճարից դուրս գանք, ես ուզում եմ, որ մտածենք երկու բանի մասին. առաջին հերթին՝ մտածենք, թե ինչպիսին է հարաբերությունը մեր ու Աստծո միջև, առո՞ղջ հարաբերություն է արդյոք, թե՛ ոչ: Եթե ոչ, այն ժամանակ ավելի աշխատանք պետք է տանենք, որպեսզի, այո՛, առողջ հարաբերություն լինի: Եվ երկրորդ՝ մենք պետք է լավ ըմբռնենք և հասկանանք, որ Աստված տալիս է, ինչ որ պետք է մեզ: Այսօրվա ավետարանական ընթերցվածում մենք տեսնում ենք, որ մեզ պետք էր Իր Միածին Որդին: Մենք տեսնում ենք, որ մեզ, որպես հավատացյալ և հավատարիմ անձեր, պետք էր, որ Քրիստոս գար, խաչվեր և կրեր Իր ուսերի վրա մեր մեղքերը, որպեսզի մենք կարողանանք այդ հնարավորությունը, այդ կարելիությունը ունենալ արժանանալու հավիտենական կյանքին:

Միրելի եղբայրներ և քույրեր, ես աղոթում եմ ձեր բոլորիդ համար, որ մենք ավելի լավ ըմբռնենք, ավելի լավ իմանանք՝ ինչ է լինել լավ քրիստոնյա, ինչ է ունենալ առողջ հարաբերություն Աստծո հետ: Եվ աղոթում եմ, որ բոլորս արժանանանք հավիտենական կյանքին հավիտյանս հավիտենից. Ամեն: